

四庫全書

集部

欽定四庫全書

集部
華泉集卷七

詳校官中書_臣沈 颺

中書_臣劉源溥覆勘

總校官庶吉士_臣倉聖脉

校對官編修_臣蕭九成

謄錄監生_臣張 昱

欽定四庫全書

華泉集卷七

明邊貢撰

詩集

五言絕句

十六夜

春城燈火靜華月滿天街陌上歸來晚香塵有墮釵

中元見月

申子歲

坐愛清光好更深不下樓不因逢閏月今夜是中秋

董啓之按滇過鄞省母夫人焚黃于父墓作難
將寸草心報得三春暉十章贈之

垂柳拂征鞍雨中行路難河梁一分手山疊水漫漫
歲月交心久江潭別路長手中雙白璧持贈比干將
離心似明月皎皎在方寸但令光不遺道遠何足恨
北堂天未晚遊子歸來早堂前一夜風開遍宜男草
白髮對青岑日高江院深豸冠階下舞好慰栢舟心

荒壠薦秋蘋深恩詎能報嗟嗟死後封猶是生前誥
人生重鄉邦歧路苦南北簡書限王程欲住不可得
歲歲中臺使巡行道十三要知君歷處風土接交南
萬里炎荒地經冬復歷春帝星臨柱史休祀碧雞神
繡斧肅霜威澄清志不違瘴鄉人拭目驚喜見晴暉

寄王升舍人二首

不見王子猷經春復歷夏有時中宵夢宛到君堂下
獨把重陽酒西風白雁回江南菊花早應傍美人開

送于利四首

送君城南橋笑折城南柳歸來掩關坐皎月當牕牖
霜下夜已久清軒調玉琴淒涼湘水曲窈窕白頭吟
一別春城雨兩回秋月圓燈前不盡醉書札但空傳
離腸似連環宛轉不可絕相送淮水秋相思燕地雪

送馮侍御允中還郴

離館背寒塘霜清野菊芳美人千里去明日是重陽
驄馬逝駸駸蒼林蔭長陌憐君楚雲外獨作秋江客

送客四首

相思若連環宛轉不可絕
那知汴上逢却是關西別
梁苑送君處溫風吹客衣
盈盈春暮感不為落紅稀
故人滿秦隴為寄一言拜
問我今若何病多慵束帶
日照昆明水雲開少華峰
夢魂登覽處白髮倚青松

雜畫十一首 為儲紫墟題

日出打魚去日斜沽酒還
漁翁家不遠只隔岸西山
藹藹古城暮遙遙車馬度
同為城外人不識城中路

北風吹大雪向夕滿空山遙見山中客懸燈草屋間
雞鳴山店昏四郊風雨辰蒼茫野田際愁殺獨行人
田家春酒熟野老日相過醉別衡門外山鶯啼綠蘿
江水春春碧江門畫畫開荒村過客少獨自掃蒼苔
道上秋雨過道傍秋樹紅采樵歸樹晚吹笛月明中
閉門聽春雨開門寡行旅借問橋上翁河水深幾許
征夫幕前侶杳藹出幽林欲渡溪橋去山中暮雪深
鳥啼青石岡日照紅泥坂杳杳雲外鍾山僧獨歸晚

上山行采薇下山行苦飢山風夕凜凜吹笠復吹衣

畫上四首

放舟前溪水水文白如練風吹絲裊裊驚起沙中燕
烟霞變陂水山照暖楓林不聽舟中語誰知江上心
月色沙上澹山雲天際浮春江萬里濶獨見一漁舟
經旬不出戶忘却城南道江亭細雨過一夜生春草

題孫志同侍郎扇圖

青青山上松繚之以白雲雲山不可到圖畫只空聞

山木各有林烈士各有心借問種松意悠悠江漢深

題畫

手種江頭樹成林已數秋寄言樵採客留繫木蘭舟

畫三首

近浦寒潮落平沙返照紅不嫌歸路晚家在板橋東
旭日上東峯山人睡正濃洞門無鎖鑰長是白雲封
琴罷興不盡起登江上臺水空秋萬里不見一舟來

方日升雜畫

雞雛不離母離母聲不休如何宦途人歲歲天邊遊

右雞雛

枇杷江外果感念主恩深長憶叨供奉朝回滿袖金

右枇杷

異質人所貴能令鼠窟虛如何北牕下閒卧飽溪魚

右獅子貓

迢迢越裳國萬里獻珍禽不覩周王化誰知姬旦心

右白雉

題子立扇頭

江靜無飛鳥，亭空有落花。主人何所在，沽酒向漁家。

題賈子扇頭

迴風起船頭，激浪落船內。生憎木蘭橈，搖蕩日光碎。

題扇面小景四首

秋樹鳥聲寂，夕陽山影沈。遙憐抱琴者，不為訪知音。
獨坐草堂餘涼風，水閣虛門前相訪者。應有載來書。
罷釣歸來晚，前溪水正深。臨橋不敢渡，誰識此翁心。

茅堂枕江涯種竹只九箇時有清風來還同故人坐

畫竹

石染湘江淚真涵太極情百年雙老眼相對兩無聲

題林醫士畫冊

江上春潮靜舟中日似年不須生羽翼無事即神仙

中秋慈恩寺登眺過崇國寺分體二首

東寺復西寺朝遊還暮遊百年塵跡裏同醉幾中秋
寒月出關山秋牕白如曙空流雲中影不照雲中戍

西園八景

朝看長白山暮看長白山山色有朝暮吾心常自閒
清川映白石游魚止復行共有臨淵羨能無結網情
月落古堤上人行春陌頭曉煙如有意長伴綠楊樓
初日照園桃盈盈散霞綺主人牕中坐顏色宛相似
共道農家事辛勤在一春靜觀田野際多少輟耕人
近浦寒煙上平沙落鴈遙行人欲歸去舟子故招招
寒泉冽古井上有雙梧桐借問往來者誰知疏鑿功

城外望城中朝來氣逾爽吾心浩然者入夜還能長

泛南湖十首

聞道南湖曲芙蓉似錦張如何一夜雨空見水茫茫
水殿穿湖入風闌過雨凭微微夕陽外時見出林僧
盈盈綠水際汎汎白鷺羣借問乘舟客何如王右軍
碧樹圍青殿朱垣接紺堤王孫罕遊豫馳路草萋萋
風恬湖水平畫舸月中行不見漁父處但聞漁笛聲
汎汎白鷗鳥悠悠長自隨憶君何處切湖上月明時

深淺元無定行舫識水頻急流天下險最好是平津
嫋嫋暮風細團團秋月明沙河聞不遠起我故山情
赤日亂青霞照我湖中舫來船時借問前途水深淺
睡起看雲坐玄心入杳冥吾將訪蓬島雙棹莫教停

自泉上歸登西門樓

落日照行蓋涼風吹不休未消臨水興還倚對山樓

集江淹句

白日隱寒樹層陰萬里生歸人望烟火歲晏返柴荆

雜咏四首

黃金滿歸橐白日行亦懼道左遺愛碑賊來將不去
乳燕巢古堤流鶯度層閣試看白馬郎金丸向誰落
東山雷殷殷南澗雨冥冥愛爾衡門下團團松蓋青
行人爭渡急江黑雨鳴船戢戢中林鳥歸飛薄暮前

山中雜詩

下馬古寺門偶與山僧遇相對兩不言蟬聲在高樹
園果垂丹實園丁日夜看未曾供寢廟不敢獻中官

無題二首

楊柳三春暮沙場萬里餘紫駟何日返空有寄來書
庭際何所有有萱復有芋自聞秋雨聲不種芭蕉樹

冬至上陵途中雜咏八首

鴉啼古城上月落古城闌城外車馬道清風飄素塵
蒼蒼土門口日出逢樵叟問爾何事來山中苦無酒
沙苑平如掌青青苜蓿痕昔時放馬地今作牧牛村
朝從田父飯憩馬古林西村雞不知曙日高猶自啼

蜿蜿野田中白鷺靜如掃停鞭問征客云是居庸道
枯楊臨大堤上有鸛鵒窠春風幾日至曾使綠陰多
山中風日暖藹藹似初春亂石牛羊逕時逢掃葉人
月出東陵峯照見西陵樹何事同心子山中不相遇

同台峯熊侍御看花四首

娟娟葉含雨菲菲香近人如何向陽蕊開花向陽春
秀色紅翻坐濃陰綠遶堦覲花還拄杖衝雨不憐鞋
借問雨中好何如晴後看錦江紅濕處應記獨憑闌

室靜客稀賞地偏花更清自開還自落宛似野人情

題內兄子立扇頭

斜日清源北浮雲岱岳東故山歸路好不得與君同

七言絕句

寄李顯之

逆旅逢秋感倍深美人何處坐鳴琴南宮只隔西河水
一夜相思萬里心

集杜句贈胡三良醫

此身飄泊苦西東未就丹砂愧葛洪
多病所須惟藥物知君才是濟川功

卿到朝廷說老翁秋來相顧尚飄蓬
釣竿欲拂珊瑚樹未掣鯨魚碧海中

長開篋笥擬心神巾拂香餘搗藥塵
詞翰升堂為君掃已知仙客意相親

斷腸分手各風煙肺病幾時朝日邊
同輦隨君侍君側自稱臣是酒中仙

春日雜興集杜句

二月已破三月來百年多病獨登臺
支離東北風塵際懷抱何時得好開

柴門空閉鎖松筠燕子銜泥兩度新
不是尚書期不顧故園猶得見殘春

未有涓埃答聖朝便應華髮老漁樵
東流江水西飛燕人事音書漫寂寥

自從官馬送還官信有人間行路難
獨在陰厓結茅屋

強移棲息一枝安

七月七日同侍御毛東塘渡河遇風

偶然同渡不同舟
風到揚帆共逆流
莫謂狂瀾無砥柱
高行千古鎮中州

迎鑾曲二十首和劉希尹之作

南幸三吳北幸幽
乾坤開闢兩神州
文儒自守高皇訓
武將誰分聖主憂

金陵自古帝王都
碧石清江儼畫圖
五聖百年虛想像

鸞輿曾到此間無

滾滾飛塵千里餘
驛途來往日無虛
皇心旦夕懷慈聖
數遣中官問起居

石頭城如銀虎盤
金陵山似玉龍蟠
休訝六軍停蹕久
本來江左是長安

綠柳陰中顯赭黃
路人爭說見君王
只為薦新供寢廟
水邊終日打魚忙

孝陵重樹紫金山
王氣葱葱碧漢間
靈殿本無荒草入

掃除霜露始應還

自采民風問老農
微行不遠近官從
那知天子關天象
到處雲成五色龍

羽蓋霓旌曉出遊
紺霞紅日映江流
雲中帝子三千闕
海上仙人十二樓

青龍山下虎蹄新
玄武湖中躍錦鱗
錯意吾皇好漁獵
不知端訪後車人

揚子江頭駐六師
太平天子賞功時
紅雲影亂黃龍艦

白日光搖繡虎旗

弓如滿月向江開
箭挿寒潮捲浪迴
水上鼃鼃莫深避
我皇元為射蛟來

江口傳呼大駕臨
順流風雨注江心
風起半山羣虎嘯
雨來深水一龍吟

大君仁聖迴非常
遠似唐宗近宋皇
訪道先過趙普宅
哀賢還弔魏徵喪

潮落江門煙水秋
雲帆八月過揚州
兩京馳道三千里

夾岸垂楊接御溝

翩翩龍馬控琬戈
白日清秋沛上過
聖主守邊思猛士
臨風高詠大風歌

九月南征九月迴
清源黃菊趁時開
何人得似行宮蕊
兩度親承萬壽杯

瑟瑟金風鳴玉鑾
路車何日到長安
官河不似江濤險
只恐秋深白露寒

疊鼓凝笳入禁中
似聞韶樂奏南風
通明殿敞秋雲碧

閭闔樓開曉日紅

雪殿雲墀列羽旄
天王開宴賞勲勞
封侯未賜將軍印
歸馬先分戰士袍

郊祀元居百禮先
史文虛擬闕今年
小臣曾讀三王紀
冬至由來始祭天

凱歌五首

日射江流生紫氛
喧喧鐃吹隔江聞
江頭巨石高千尺
好勒元戎破賊勲

帳前銀甲映朱旄
帳外牙旗捲日高
白晝紅塵飛一騎
尚方新賜玉麟袍

虎豹鯨魚一夜擒
湖南湖北動歡心
論功宜並衡山峻
比德還同漢水深

秋水沈沈漾列星
盤渦殷殷聞雷霆
扁舟昨夜巴陵過
風起猶聞戰血腥

鳳儀獸舞盡來王
犬豕何知悖且狂
高壘固巢今不見
麻洋灘下水湯湯

秋日過西內園殿

御溝東畔古松盤
曾得先皇倚笑看
龍馭不歸鸞吹杳
石廊圓殿鎮秋寒

雲中曲二首

六軍歌舞健長征
五色雲隨九仞旌
傳語單于休近塞
太平天子駐天城

萬歲聲懽四海聞
大同新策破戎勲
漢文可是勤邊主
按轡閒過細柳營

感事八首

天山戎馬本天驕，入貢能輕道路遥。
底事內兵翻作亂，禍胎疑自武宗朝。

一自甘州殺憲臣，國家綱紀似秋塵。
各邊聲勢元相倚，緩急誰為死力人。

代郡城中十萬家，膏粱珠翠甚繁華。
兵殘火烈須臾事，女哭男啼亦可嗟。

宣府雲中五日程，朱門王子白衣行。
回頭却向西山哭，

玉眷金昆知死生

諸將邀勲各逞能邊軍反側寢還興撫哺休誇桂元帥
綏來還有蔡中丞

紫荊西望白雲山腹裏雲中指顧間好降絲綸促諸將
急操兵馬備三關

城中金鼓晝逢逢城上高懸首級雙二十四家同日死
自今休更說招降

白日城門四不開就中情狀頗難猜乘時早定安邊計

只恐春深牧馬來

宮詞次陳以道韻

佳麗曾矜得寵先後宮歌舞一當千
那知寵極能生妬
不是青娥誤少年

次白巖韻甲申除夕五首

前山雲接後山煙可道公歸是偶然
霖雨出山知有日
入山親紀甲申年

北牕閒卧讀南華出處吾生信有涯
五色曉雲天子宅

一籬秋菊野人家

黑髮黥名鏡裏看
紫宸章疏早辭官
閒心自愛高山曲
懶聽人歌蜀道難

落落朝廷醉眼中
苦緣憂國願年豐
老臣心事如工部
只有升沈迹未同

留公無計奈公何
外國中朝屬望多
此日同為太行賦
幾時重和慶雲歌

趙文昌中乙榜雨中感懷見遺走筆和荅

華髮王門晚拜官
齊竽聲裏獨成嘆
何人為薦長沙傅
一見文皇獻治安

十日春無一日晴
客堂沽酒莫辭傾
紙牕風信梨花雨
惱亂歸心是此聲

撚斷吟鬚字未安
短歌聊爾代長嘆
春風座上無邊景
漫道儒官是冷官

春歸花落鳥無聲
一夜閒愁帶雨傾
自古浮雲本無定
漫將消息問陰晴

荅灤江王中丞見懷之作

院臺深處綠陰屯
松下棊枰竹下尊
苦憶去年歡賞地
碧天如水月當門

贈北山周子二首

宦接鄉山事已稀
謫居猶得近王畿
勸君今夜且雄飲
明日出城風葉飛

華髮青袍不染塵
宦程迴復主恩新
縣人爭說中都宰
曾向雲霄忤貴人

荅台峰侍御見候三首

斜日照雨明霜臺紅花白花相映開
野老愛花情太劇不須招致也能來

葵花半紅山雨來不辭沾濕看花開
主人莫掃花前徑恐破青陰與綠苔

一尊花底思悠然落日空庭席屢前
酒熟共懽遊此地花開誰與坐明年

寄姜廷輔

王昇店前秋草生秦皇臺畔暮蟬鳴海翁欲訪無人識
何處孤舟短笛橫

胡菊泉惠我丈菊走筆謝答四首

菊花元自菊泉分見菊真如即對君安得對君還見菊
短籬斜日坐秋薰

丈菊亭亭入座新白花輝映白綸巾生來自有凌雲志
可是孤高不近人

一枝分取到山家月映疎籬水映花欲把贈梅詩贈菊

暗香浮動影橫斜

月閨逢秋菊早芳盛開還喜近重陽休憐閒寂朝臨水
且看孤清晚耐霜

贈王松溪四首

月下山車往復回秋深歧路滿青苔不緣鄉飲邀賓坐
肯向城池故故來

暮春庭館見花稀黃鳥嚶嚶燕子飛堂北假山苔蘚蝕
祇應偏待主人歸

雨過茅屋秋草生霜淒榆塞候禽鳴閒來倚杖柴門外
童子騎牛短笛橫

十年離思一宵同坐歇寒鐘意不窮碧草未舒湖石畔
黃花爭艷竹籬中

次崇陵韻題黑菊贈石岡

圖史春行滿客囊此中偏載晚籬香臨歧欲採寒花贈
似隔盈盈水一方

次白洲韻贈黃教授二首

賈生只合住長沙三載江陵却寄家
雲靜碧天秋日午
講堂吟對木樨花

春日費宮花正開
宮前宮後錦成堆
如今南郡多桃李
盡是黃公種得來

寄洪山人二首

隱君家住白雲間
不愛功名只愛閒
聞說花園新更好
門前流水屋中山

卧牛山前春草肥
華陽宮外雨霏霏
主人侵曉踏青去

日暮家童扶醉歸

題梅贈華山人

夢裏神交幾見親
畫中還比夢時真
歲寒心事東風面
人與梅花一樣春

憫雨奉答白巖光祿

故鄉風景夢依然
魚浦牕西兔嶺顛
誰道不歸歸未得
芙蓉牕下抱愁眠

赤日簾櫳如火然
野夫懷秋病欲顛
安得海風吹霹靂

九淵呼起蟄龍眠

東潭甯子將赴潛山以棊几留贈

荒涼棋社隔秋春
世事年來著著新
眼底相逢論成敗
誰知當局苦心人

髹几文楸光照雲
僧堂長與對斜曛
翻愁置我南牕下
一度臨棋一憶君

泊河口却寄林醫士二首

杏子成林竹護牆
傍河雲物畫蒼蒼
園中似是林家屋

過客時聞藥草香

凶年老穉多奇病
吉水仙人有妙方
不用相逢問名字
滿城人說是醫王

孫塘秀才以芍藥二枝見贈走筆奉謝

芍藥開時三月過
京華五月見猶多
雲栽露種元相異
雨驟風狂奈爾何

長安日日走塵沙
春盡多時不見花
蒲州公子能相送
醉倒東山處士家

贈楊撫軍

白馬香風度落花
絳桃穠李避妍華
長安陌上歸來晚
笑指龍樓是外家

五月六日東孔倅

艾家河邊蒲葉長
扁舟昨日過端陽
荆南客路千餘里
回首銅臺亦故鄉

金陵逢方日昇

燕市分攜十七春
白門相見白頭新
鳳凰樓畔含香侶

江海飄零有幾人

東園徐君送藕栽戲呈短句兼求碧桃

玉藕根移玉井高
感君分贈謝君勞
書生見慣秋江色
且向名園問碧桃

題扇寄壽春希尹

淮南花雨送春還
叢桂陰陰郡閣間
自是劉安有仙骨
謫居猶近八公山

題扇寄錢畫士

睡起看圖氣未降丹青誰有筆如杠欲煩畫我茅亭下
靜數飛帆涉大江

睡起口號戲呈黎仰止

兩家兒女對船牕學語真同乳燕雙日午夢回成一莞
不知身世在清江

題菊贈俞國聲歸無錫次韻

遠攜尊酒惠山來夢草情牽對月盃雲際忍聽雙雁別
水邊愁見一帆開

寄呂思泉次韻

京國論交記往年城南風景夢依然
春江未卜看花地秋水空歌伐木篇

次韻梧山中丞寄別東塘侍史八首

宋臺梁館暮霜餘野色蒼茫擁使車
馬首不隨南去鴈袖中元有北征書

岸葦蕭蕭河水寒驕嘶驄馬鞚銀鞍
燕山代谷飛騰過送別無歌行路難

行部能教陰雨晴渡河還遣濁流清願磨中岳山頭石
記取西江御史名

漫懷家慶感晨昏國士須憑國士論聞道阿翁將阿母
花間長日醉清樽

諫草書殘驛舍燈翠華衝雪恐難勝回輶莫向春明路
見說君王在白登

羽蓋飄飄白日臨迴光應燭小臣心願同汲黯留中閤
更擬相如賦上林

每逢朝客轉驚神北望長安幾側身紫禁烟花夾城柳
別來今已十番春

閃閃龍旗樹五更煌煌之火照層城當年奉引趨蹕地
曾聽鈞天廣樂聲

東馬公順同年

三載風塵一見難每將書札報平安梁園幸是同官地
春月春花却自看

顏聲寅長惠川扇

蜀璽離離金錯光
遠隨驄馬過秦梁
奉持敢作尋常看
一道清風五月霜

寄何仲默

梁王臺前春草生
梁王臺上烏嚶嚶
美人遙在黃金屋
客子登臨空復情

贈長垣宗室二首

鳥語深宮白日斜
彩毫濃墨散春霞
王孫不學雕蟲技
只寫忠花與孝花

瑤室青編萬卷餘
宮中誰道日間居
家臣昨夜長安去
猶問君王乞秘書

重贈吳國賓

漢江明月照歸人
萬里秋風一葉身
休把客衣輕浣濯
此中猶有帝京塵

寄閭衡之同府二首

客來君寄一雙魚
客去還君一紙書
欲買扁舟向東下
洞庭春浪近何如

江上逢君感昔年
往來相見陸陵前
那知宦跡如萍梗
猶得相依一水邊

寄京師友人

同朝同寺十年情
迢遞燕山隔楚城
一別天涯今萬里
欲從何處望春明

贈阮翁三首

躍馬橫戈老尚堪
時時遊獵過龍潭
遙知此日非熊兆
不在周南在漢南

鶴髮虬鬚八十齡
白頭長對峴山青
朝來虎帳看雲坐
閒課諸孫讀武經

眉際生毫似髮長
採苓時到白雲鄉
閒來莫向桃源去
恐有漁人識阮郎

夜宿太常官舍懷元佐二首

咫尺東曹信渺然
別離何似路三千
松牕月色槐陰雨
一夜愁心似隔年

文園消息近如何
酒盞生疎藥裏多
却向故山憶舊隱

膏肓從古在煙蘿

荅秦孟陽長史次韻

長鏡秋圓自鉏荒
望入高山路渺茫
不信愛蓮亭子上
有人白日到羲皇

塵滿紗帷舊業荒
江都雲水暮蒼茫
清時不用天人策
方朔詎諧侍武皇

枕上簡獻吉二首

自入秋來日日晴
看花看月每同行
一夜六街風雨惡

莫言天不解離情

早涼衝曉入紗帷
聽雨聽風睡起遲
街西咫尺不相見
却似河梁別後時

諸友二首

濟水源南舜井旁
月明曾共坐宵長
六春睽隔離江路
五月相逢是帝鄉

雙鴈北來河水平
兩岸秋陰蘆荻生
黑頭七度曾過此
不似今回感別情

淮浦歌三章為太僕楊敬之作

淮浦泱泱淮水流月明長照浦中樓
白鶴青猿好相訪
主人今只在滁州

清淮蒲荻晚蕭蕭浦口山明欲上潮
七里正貪漁艇樂
九重無耐鶴書招

水蓼花紅淮浦煙晚來鷗鷺下翩翩
依沙宿槳當門繫
莫是楊家問字船

俞國昌大叅小松二株

鬱鬱青松尺許長似看顏色有風霜何時却覩干霄勢
六月濃陰覆草堂

寓延津夜起天霽北望東彭太保

月明風靜雨初收一鶚橫空萬里秋四海蒼生正翹首
秀峰巖下莫遲留

得同年寅之管城見寄之作酬答二首

翩翩驄馬度秋涯思入風雲句意佳多病獨憐梁苑客
閉門高卧草侵階

詩來恰值酒醒餘
起步秋庭病忽除
喚婦不須愁夜黑
老夫今日得明珠

東王灤江

病裏懷人掩客牕
尚聞仙舸在龍江
觀音閣下梅花水
對雨何時倒玉缸

次韻寄王先生四首

屋裏琴書屋外田
繞庭松樹古藤纏
何時却遂東山約
閒伴先生樂暮年

綠陰回首代紅英
客舍流光只可驚
病起偶寬書簿債
獨將尊酒向誰傾

博得荆南五袴歌
一錢囊底奈貧何
匣中猶有龍泉在
閒就巴江石上磨

一麾江郡領塵官
何似山中漱水歡
梁楚板輿平似砥
憑君休說路行難

口號呈問龐二少府

黃鶴樓前夜泊舟
葦花楓葉似江州
樂天本是多情客

卧聽歌聲起別愁

內弟文甫至清河一見而別題扇贈之

逆旅相逢意惘然四年寃夢一燈前
即教乍見還分手猶勝山陰雪夜船

謝東園送菊

薄暮霜籬景色加名園分得歲寒花
誰知建業騷人館不是潯陽處士家

寄閒齋少宰四首次白巖韻

邦江西路沂流風城郭山林道路通兄弟自為真率會
祇應隨儉復隨豐

腰裏燕臺白玉珂水亭山寺賞吟多相看已恨俱華髮
更奈蒼江遠別何

登臨隨處見題名想像當年載酒行山翠不遮牛首寺
江流長抱石頭城

竹門瀟洒對江開中有高亭扁快哉為問亭中二仙客
幾時騎鶴上蓬萊

瑞卿留別以答

揚舫無奈客心何
暑雨平添潞水波
草閣驛亭談笑別
碧山回首暮雲多

題白頭翁鳥圖送友人歸蜀省覲

短棹長江下蜀州
家中風景畫中收
蒲牙出水荷錢小
一笑相看兩白頭

唐仁夫出使廣西四首

碧衣黃簡照青春
寵宴傳呼出尚珍
辭罷閣門東上馬

道傍羅列拜王臣

樓船風景入春多
鐃吹聲中故里過
兩岸綠楊陰不斷
隅江知是柳州河

手捧鸞書下九天
恩光初到墓門前
山川不改孤兒恨
風木蕭蕭似往年

十年知己一綈袍
萬里南雲望爾勞
待得明年好春日
牡丹花裏候旌旄

送錢水部致仕次杭秋官韻

虎頭將軍圖畫奇成都待詔功名遲
春風草草拂衣去
授老相尋知幾時

冥鴻杳杳碧天秋
虞人網羅空復求
朔地苦寒江渚燠
常時虛擬稻粱謀

青門掛冠春欲暮
白首放歌江上歸
野老相逢話朝市
龍飛天子正垂衣

老子田園歸興豪
已將功業付兒曹
庭中手種梧桐樹
他日朝陽看鳳毛

蓮葉田田溪日曛竹竿裊裊白鷗羣
水南即是長洲苑
杳靄歌聲穿暮雲

東觀雞號風雨冥十年通籍綰銀青
栖栖不向故山去
兀兀窮愁何以醒

秦州石經半埋土蘚剥苔封誰為開
憑君覓取吳中本
江上雲帆日往來

送顧侍御出守馬湖五首

露冕南征火井西東過瀟水北泥溪
借問鄉愁何處切

千山明月子規啼

五馬驕嘶錦水隈
雙旌遙指劍門開
巴童吹笛羌兒舞
重見文翁鎮蜀來

五月瀘州蕉葉黃
武侯祠下水如湯
行人莫惡南中熱
自有叅天古柏長

古箐人稀秋草深
碧松蒼檜接陰森
高樓永日彈碁暇
海北天南萬里心

漢家驛路止牂牁
相望龍湖路幾何
聞說夜郎天更遠

潯陽李白亦經過

送潘伯振守漢中三首

石棧凌雲鳥路賒漢中城府枕三巴
風林落葉猿聲滿那得行人不憶家

白馬河邊春日晴黃牛山下百花明
家家耒耜居民出太守來時親課耕

金城戶曹張鳳翔埋玉空山宿草長
天上故人驅五馬經過流涕問孤孀

送蘇通判四首

天涯相見地曹郎
郡閣清尊夜語長
休向燈前易成別
江頭春水正茫茫

曾並長安逐馬蹄
謫居同過楚雲西
他年縱有看花句
休向玄都觀裏題

去歲秋風別省闌
木樨花落雨霏霏
那知此日江陵郡
春草連天送客歸

春風江閣喜同遊
苦恨逢君不少留
東去巴陵三日路

幾時同上岳陽樓

送張元亮二首

知君元在識君先
水國相逢亦偶然
何日一尊還遠別
暮雲春樹暗江天

冉冉游雲覆短簷
霏霏寒靄度重簾
羈懷正苦逢春別
行李何妨入夜淹

送林贊賢醫士歸臨清四首

送君樂源溪水濱
岸桃堤柳俱鮮新
黃鸝聲中白日晚

又是鄉園一度春

林花欲開春草生村煙漠漠午雞鳴
君行落魄似阮籍
休嘆路歧縱復橫

臘月驅車東郡來元宵今始雪中回
臨清城外成林杏
盡是州人為爾栽

雞聲喔喔宵近庭出戶忽聞春雨腥
西江高士別我去
日出烟消山更青

送賈廷臣司訓二首

行李蕭條石逕荒
賈生東去路茫茫
盧龍不是長沙地
莫把吾皇比漢皇

卑耳溪邊秋草深
裂坡山北樹陰陰
西風匹馬弔孤竹
一曲商歌千古心

送毛東塘侍御北還後懷寄八首

汴上相逢一載餘
五雲回首送軺車
河梁別意真堪畫
行李蕭蕭幾卷書

霜雲千里朔風寒
多錦貂裘獨據鞍
大厦如今要梁棟

憑君歸報得材難

夜來風雨曉來晴萬里無塵海岳清白日共看驄馬色
青天不負使君名

漫談時事共傷神白首丹心許國身歸覲正逢長至節
六陰行且見陽春

榮親報國皆吾事孝子忠臣只此心聞說致身同養志
莫分朝市與山林

客牕風雨對寒燈午夜懷人思不勝梁苑宋臺秋色裏

也應回首憶同登

別來公署易黃昏
心曲憑誰與細論
宦海風波無定處
相逢何日對芳樽

夢回歌枕夜三更
烟樹微茫隔衛城
獨向屋梁驚落月
不堪還聽雁來聲

衛輝阻雨奉別幸菴彭太保

宦情時事劇秋雲
話到傷心不忍聞
別夢迢迢似明月
漢關楚塞遠隨君

別湯萬戶

半生湖海識君遲，可奈相逢是別期。
扁舟獨泛秋溪水，採得芙蓉欲贈誰。

送呂二守西征二首

六月戎船上逆流，書生彈鋏取封侯。
夜來羽檄江邊過，聞說西戎破劍州。

巫峽瞿塘十丈波，大寧鹽井火雲多。
賊巢散滿空山裏，舊日居民有幾何。

客懷六首

萬山深護一書樓
此際栖遲景最幽
浮海未酬當日志
北歸還買洞庭舟

薰風江上棣花開
醉倚蘭橈首重回
孤影却隨南雁去
尺書還附北鴻來

水耨方閒即火耕
土風遙識楚江程
汀花冉冉鳬鷺色
岸柳陰陰布穀聲

鬚絲端為別兄睹
魂夢真如道路何
滇海萬峯秋雁少

楚江千里月明多

遠從江左入湖南
姜被初分思豈堪
間算長公年紀數
白頭今已六旬三

望遠時從郭外遊
好登江閣與山樓
煙開碧樹通吳苑
日落黃雲接楚丘

送雷州趙太守四首

蘇公樓前海日晴
伏波祠畔瘴煙清
荔枝垂實枕榔暗
太守來時雙鶴迎

詩人出守是尋常萬古心期一瓣香若道雷州非樂土
請君時到十賢堂

海邦雲霧畫霏霏榕樹林中孔雀飛驛騎忽傳天使到
九重親賜玉環歸

我在江陵望帝鄉登樓時恨楚天長憐君更隔三千里
嶺樹湖煙更渺茫

題竹梅

黃梅綠竹兩寥寥一段清光惜浪拋看遍乾坤空老眼

幾人解取歲寒交

秋海棠五首

海棠盈盈開素秋
雨晴斜日上簾鉤
幽芳不與春風約
碧榭朱闌俱暮愁

海棠開日近重陽
秋蝶翩翩過短牆
題品要知觀物眼
只須風骨不須香

海棠花開秋雨霏
休將遲暮怨芳菲
東園桃李盈千樹
昨日穠華今日稀

庭下秋棠開紫綿映風含雨淨娟娟羽人自解丹丘術
種得花來亦是仙

梧桐葉凋金井蘭芭蕉風雨怨秋殘海棠十月猶含蕊
故伴青松當歲寒

向曹伯通乞白菊

節過重陽菊已殘倚霜歌露不勝寒山堂正少黃金蕊
試看君家白玉團

王使君誨處覓猫

時王有母之喪

雪白狸奴尾勝金曾娛白髮戲花陰急須分乞鄰姬養
莫遣空推孝子心

倫上人遺杏戲荅

帶葉生英顆顆新竹藍初發齒生津清酸本是儒家味
不道山僧亦戲人

晚雪

梅花枝上報初春灤水源頭憶故人天宇自清心自白
不知何處有紅塵

和蔣儒士韻題便面

江樹青山歇晚秋
草堂幽僻對寒流
故人遠赴關西去
明月蘆花繫釣舟

題張秀才釣魚便面

鱸魚釣得上綸鉤
歸去應須與婦謀
攜取一尊同客醉
江風山月更何憂

次正齋韻題石岡圖

白石岡頭榆柳新
蒼蒼茅屋掩深春
山翁不註揚雲易

怪底門無問字人

三友圖為蔡石岡題

歲寒池館暮相依
雪共心期月共輝
南北宦遊三十載
碧山回首故人稀

題扇

綠慘紅蕩春色闌
枝間黃鳥任綿蠻
知機自合高飛去
莫遣增羅絆羽翰

以免圖贈王生魚附短句

我來贈君玉兔圖我去留君雙湛盧月殿秋風桂花發
一枝能斫寄來無

題陸子引畫

水榭山林向夕幽笛聲遙在木蘭舟江空處處多月
不用相尋秉燭遊

題萱圖

繞膝曾玄認不真北堂風景日長春堂前滿種宜男草
一度花開一度新

題美人

時外舅胡觀察謝政家居寄此通慰

月宮秋冷桂團團
歲歲花開只自攀
共在人間說天上
不知天上憶人間

題廷相兄扇頭

萬里乾坤見此亭
四圍山色繞闌青
何當著我亭中坐
閒校神農本草經

毛驃騎扇頭

玄菟城外草連天
鴨綠江頭春可憐
將軍飲馬臨江水

東指扶桑在日邊

題行南卷

小結幽亭倚大江
萬竿深處聽飛瀧
橫琴試鼓湘妃怨
彷彿鳴珂過北牕

題家園風景圖二首

苔水羌山清更深
蕭蕭蘆渚間桑林
青楓樹裏三間屋
十載常懸萬里心

萬竹深深一徑斜
草堂門卷接江沙
主人遊宦不歸去

時有白鷗來釣槎

題墨萱

華髮當年倚笑看
北堂春色映朱闌
披圖彷彿慈顏在
零落霜風夜雨寒

題天鵝海青圖

雲暗霜天雪滿衣
駕鵝聲亂海青飛
李陵臺下燕山北
正是單于夜打圍

題金憲長舜舉蓉溪書屋圖四首

蓉溪主人溪上來來時
廉訪去都臺共道溪花似溪主
暫時搖落又還開

溪水溪花相映鮮
溪風時拂案頭絃
輕鷗白鷺知人意
雙去雙來精舍邊

錦江東會蜀江流
卜築還依江上洲
十里錦雲千頃碧
此中風物最宜秋

秋溪明月夜經過
兩岸芙蓉照綠波
溪上主人元好靜
巴童休唱下渝歌

題扇次仲仁韻

月落江空萬里秋一聲長蘧古槎頭
漁郎此意何人解
水底蛟龍水上鷗

題呂叔通扇次白巖韻

江草芊綿江雨霏王孫孤艇泛潮歸
寂寂江亭搖落處
碧雲回首雁行稀

題吳隱士守墨詩冊

十畝山田一舍幽草牕間卧白雲
秋行人若問墨溪主

不是當年柳柳州

題林東石迺兄松關圖

明時不作大夫官，偃蓋空山老歲寒。
試問玄都舊桃樹，幾回花實幾凋殘。

題戴錦衣扇

溟濛湖水抱村斜，湖上扁舟載晚霞。
怪得看圖意渺渺，圖中風景似儂家。

題靖遠侯畫菊扇頭

百戰功高舊破戎侯門却似布衣窮傲霜枝葉凌雲幹
畫裏分明國士風

題介溪嚴侍讀畫菊

風蕊紛披霜葉清畫圖秋色笑淵明持盃只愛東籬賞
未識金門大隱情

題林下一人卷三首

禦寇曾攄報主心野雲孤鶴伴閒吟時人若欲知名姓
須向凌煙閣上尋

西府頻看策舊勲
北山常恐負移文
如何九五飛龍日
閒得無心出岫雲

卧龍山下結茅新
乞得匡時未老身
此日此菴真獨幸
天涯多少未歸人

題史元之總成都門別意卷

十五年前別帝州
早看風節動儒流
渠陽此日新開府
不數先朝定遠侯

教工部子發水亭次韻二首

晨霧流雲水閣寒
浴鳬飛鷺滿江干
風潮莫向愁中聽
雪竹還留醉裏看

曲徑回廊接圃深
竹牕松戶晚陰陰
幽花不阻三春夢
明月長懸萬里心

登仲宣樓

蜀吳舟楫檻前經
萬里鄉心杳不扃
莫問興亡異時事
滿川斜日下空庭

觀城歌七首

朱旗繡斧兩昭回南郡城池亦壯哉明月樓中堪坐嘯
關山何處有塵埃

睥睨連雲十二樓西南形勝數荊州已教峴首為屏繞
更遣巴江作帶流

江日瞳瞳散曉鴉湖田漠漠隱桑麻中丞本是陽春脚
散得東風與萬家

城廓周迴十里通遙從城上見城中不知多少王孫第
萬戶樓臺一半紅

古堰迢迢枕郭門城南城北萬家村行人共指豐年兆
雪裏青青見麥痕

大北門西擲甲山山頭古廟草斑斑中丞駐馬看遺像
認得將軍舊姓關

百雉城頭小隊行下聞閭里動歡聲防邊不在多戎馬
只有人心是甲兵

題賈園四首

灤水橋西一畝宮小牕春度碧荷風老夫野性無拘束

便欲移家向此中

門巷沈沈草徑紆綠槐深護野人居鳥聲不斷日亭午
時有小童來捕魚

樹繞園亭水漫池西溪風物最宜詩即教痛飲成深醉
莫遣空懸別後思

靡靡菰蒲傍水涯粼粼白石映青鞋今年欲此消長夏
合扁君堂作我齋

舟行近滄洲

白雲渺渺水悠悠兩岸蘆花覆釣舟年少自知官絀在
尋常不敢問滄洲

湖上雜興四首

雲水地臨三憲節江湖天放一漁舟
虛煩倚樹看黃帽耐可乘槎漾碧流

漾漾蓮舟繫古槎沈沈波影照烏紗
多情最喜臺中客乘興能看水際花

水岸風迴晚更涼菰蒲零亂拂衣裳
扁舟莫到花深處

恐礙波心片月光

萬竹陰陰暑氣微
主人迎客敞山扉
翻愁使節傳呼近
驚起舟前白鷺飛

昌平廢縣

層阿迴眺獨行行
日落春山烟霧生
山下荒城隱叢薄
路人云是古昌平

山行即事二首

山逕春深滿綠苔
景陵東去轉紫迴
忽逢樵父驚相問

言自黃花鎮裏來

陵署青青生午煙
山渠瀲灩響春泉
白頭宮監松林下
閒說英皇北狩年

草場

牧馬場邊苜蓿香
回龍宮外樹蒼蒼
當年駿骨今何處
曾被金鞍侍武皇

柳塘雜興四首

汲水澆花柳貫魚
草堂巢燕暮春餘
要知閒選誅茅意

不為濃陰好讀書

御溝東畔柳成林
御水盈盈十里陰
白馬青衫橋上客
春來多少故園心

琴臺書榭綠陰深
杖履時時隔水尋
閒過永明湖上看
幾家桃李自成陰

塘煙漠漠水迢迢
搖蕩春風幾萬條
不傍御園歌舞地
只愁宮女妬纖腰

泰山回馬嶺

回馬嶺前春日西澗花巖樹鬱萋萋上方鐘落不知處
惟見白雲巖畔棲

貞女祠

長城在秦那在齊齊山古寺春草萋千載哭夫能變俗
至今猶說杞梁妻

鹿門山

龐公舊隱鹿門山近在襄城漢水間石洞草荒無路入
夕陽時見鳥飛還

習池

習家池上草萋萋
流水成渠稻作畦
山簡不來遊客散
居人猶唱白銅鞮

峴山

大樹蕭蕭白日寒
羊公祠下獨凭欄
尋常一種青山石
長使行人灑淚看

望岳亭為王生作時其父戍雲中

東岳名高四海間
此山之外更無山
何時倚杖青雲上

與爾朝登復暮攀

望岳亭臨河水隈
碧牕遙對孔林開
誰知仰止平生意
不為巖巖氣象來

岱宗西與太行臨
嵐翠霏微曉不分
底是靈州狄刺史
不看巖障只看雲

汴上題吳國賓園林

沙海原南古戰場
曲池荒畎蔭堤長
相逢折得芙蓉贈
莫向西風笑冷香

大堤

大堤女兒花見羞大堤楊柳映青樓
金壺滿注樊城酒
醉殺狂夫不解愁

梨雲軒獨坐有懷

睡起僧房日未斜
興來隨處即為家
美人不見幽期渺
閒對蒼黃數落花

棟塘歌

棟塘老人塘上遊
颯颯西風吹素秋
記得看花三四月

滿塘紅紫映波流

姚園次亭溪韻

竹塢柴關破曉開
石池花逕轉縈迴
春深漫有尋芳興
老近慚非作賦才

散步

零零宵露濕春堤
楊柳風清曉月低
童子莫愁江路滑
老夫扶老有青藜

觀風望雲

雲浮劔閣夜英英
白馬江邊踏月行
傳語啼猿莫相近
恐教遊子不勝情

飲菊泉二首

雨色巖花入牖斜
城中風景似山家
橫琴不奏朱絃調
對菊惟看白玉花

十月霜庭菊正肥
亭亭寒影照山扉
野夫本是淵明侶
可怪淹留夜不歸

或曰雖有寓意然非善言故改作

紅芳瘦盡綠陰肥
幽鳥枝頭自在棲
一日天風吹羽翮
上林便作好聲啼

浙人自遼囊父櫬返
葬感其事為賦

客衣零落鬢毛斑
迢遞沙場負骨還
三尺古碑千載恨
曹娥江上水潺潺

避喧二首

興在桃源山水間
幅巾藜杖每忘還
沙田雨濕青牛卧
石洞花深白鹿閒

北牕無人春睡安時聞春樹鳥關關老翁元是避喧者
又欲移家向別山

五月五日以扇奉寄二親侑以小詩二首

迢迢親舍白雲下長日登樓思有餘代谷燕山說近
經時不見一封書

薰風簾幙燕翻翻庭際榴花火欲然睡起忽生千里思
慈顏一別又三年

示弟賦

鴈門秋高多烈風
烟沙極目見雲中
憐君弓馬來慣
不數翩翩塞上雄

插秧歌

紅石岡頭夜雨晴
湖田水滿接堤平
行人欲問年豐儉
試向田中聽鼓聲

促梅次韻

庭下梅花開未開
帝孫邀月久停杯
終知不入繁華夢
莫遣笙歌取次催

曉起口號

春眠不奈鳥聲催
起立荒園傍古槐
怪底幽尋苦無力
夢中曾上故山來

聞董汝卿喪內二首

草堂雙燕壘新巢
坐感琴絲理斷膠
麥飯一壺香一瓣
此情何處哭芳郊

好學平生說仲舒
絳帷常坐五更餘
春來睡足三竿日
應是無人喚讀書

寫懷

白髮蕭蕭五十春
宦途猶作未歸人
何時杖履柴門路
風景依然遠俗塵

吳竹齋惠藥品

六月漳河艤客舟
小牕閒卧白雲秋
憐君饋藥如康子
不療山翁四海憂

田家

柳覆崇垣水護門
不依鄰舍自為村
何緣却近山陵道

日夕時聞車馬喧

薛汝茂乞蓮栽

薛家池中千葉蓮
出波今已疊青錢
分我不為看花色
要向山牕聽雨眠

竹店舖候高生不至

行盡荒山更涉溪
故人聞說在城西
空庭日午車馬寂
惟有鴉鵲深樹啼

游仙詞四章壽楊母次劉五清韻

翡翠衣裳雲母幘往來常在碧霄行老君臺上凌風過
王母池邊看月生

一寸靈光萬古心笑看烏兔兩升沉已遣壽顏同紫玉
更欺仙骨比黃金

冉冉霓旌覆羽仙雙雙玄鶴舞芳筵眼看庭樹真瓊樹
不數藍田是玉田

江流山色繞金堂管領年華入壽觴仙家自與人間別
千歲都來一刻長

壽歌三章為松鶴翁作

松裊山堂紅日開
天風吹鶴下瑤臺
傳書為問西王母
別後蟠桃熟幾迴

西園十月菊花黃
花底流泉水亦香
汲水採花宵釀酒
曉筵傾入萬年觴

八旬遐齒三齡錫
四海昇平見七朝
頽上漫隨巢父隱
渭南還有太公招

五言排律

留別董三屏次韻

晚照長雲合春帆細雨開別離予正苦魂夢子頻來石
路齊南境風花白下臺十年今去國千里獨憐才會
有荷裳寄應煩想像裁

遊仙巖

黃帝昔好道相傳駐此山至今鍊藥處猶見五雲還丹
井霞空聚清池水自潺鳳笙歸寂寞龍駕絕追攀曠劫
留仙跡何年啓佛關看花周法界鐘鼓隔人寰瀑響千

巖應潭虛萬象間排空雲木古夾道翠泉環澗鹿衝人
返山花照酒殷寺荒翻雅淡僧老更蕭閒問法空羣妄
探竒始一斑未能兼吏隱回首愧塵顏

白巖太宰寄示新作兼有并刀之貺奉謝一首
忽報王孫使新從相府旋下堦忘病足開牘醒愁眠碧
落仙人字黃初大雅篇空巖泣神鬼白日走雲烟策杖
東峰外看碑北岳前依微穿雪竇想像俯春泉客路千
餘里離心兩隔年倦遊甘散拙高舉謝聯翩水國身猶

寄山堂夢屢牽愧非清廟質虛枉佩刀傳

贈張御醫九齡

故居移杏圃新寵沐楓宸天馬飛黃日雲龍際會辰華
陀初入魏扁鵲舊鳴秦術妙乾坤秘功存社稷臣東衢
迎寶鑑西第擁朱輪家是華胥國人呼有脚春翻嗟縫
掖士章句老風塵

遊仙詞贈李羽士擬初唐四子體

碧落新移牒玄津晚繫槎天臨北斗地人住上清家樹

古金壇靜花深玉洞斜靈砂飛絳雪仙醴注青霞緱嶺
音書密函關道路遐月明蒼鶴羽風度紫鸞車幾見桃
成實重聞海變沙瑤牕禮星後閒坐讀南華

賦得白鷺洲送柴墟儲中丞

路轉長干渡洲傳白鷺名滄波去不息綠芷復叢生隱
隱江田抱團圞堰日明鏃沙沈壁壘牆堞隱臺城湍古
晴霓下蒲深畫虎行漁人牽網迹商女踏歌聲佳麗千
年恨豪華六代情經過夕臨眺誰並客舟橫

送金中丞赴延綏

上郡防戎切中丞入陝遙隼旂明曉甸鐃吹轉春橋二月花新綴三川雪正消北門來寇準西極使班超國仗和戎利人傳破膽謠按圖收地險堅壁阻天驕禮樂欽儒將經綸翊聖朝長城一身是詎數霍嫖姚

送許中丞德新赴甘肅

暫布山東化還為隴右行中丞新受勅賤子舊知名玉露承冠劍金飈捲旆旌羊心自直孤隼勢初橫地接

祈連若星羅冒頓營未須懷破斧先喜號長城草映邊
雲白沙流漢月明陝人歌召伯關吏識終生許國知公
志通家是我情離筵忽隔水秋望轉盈盈

送唐京兆送母還邵陽

奉詔還將母南歸樂未涯日明吳苑樹風引邵陵槎萬
里遙瞻闕三湘近接家望灘懷孔雀臨洞識桃花壽祝
青山永書傳碧海遐趙張前史艷曾閔後人誇去值桑
蠶老迎看竹馬斜却憐春別苦飛絮滿江沙

送別白樓先生次郭司業韻

曉騎傳中旨春曹陟上卿樂推吳季札經許鄭康成車
馬秋江出鄉邦畫錦行論交鞭始結惜別蓋初傾拜手
雙龍關承恩五鳳城御堦聽曳履樞密待持衡制作登
三殿聲華振八瀛新班岱嶽重舊寺雪山輕古貌看常
健冰銜列自清英英伯夷志垂白轉精明

繡斧西征為何輔之御史作

蜀道軍容使秋風振旅還功成萬里外捷報五雲間電

掃妖氛滅川流戰血殷漢兵隨指顧蕃部凜威顏曉坐
轅門靜宵登劍閣閒丹心懸海日繡斧照江關飲馬瞿
唐峽封刀麥子山班超桓典後芳駕幾人攀

題芳洲書屋為俞大叅作

見說林居勝清江繞舍流元方登瑣闥小謝隱滄洲草
菑辰占麗梧飄歲識秋煙霞互吞吐鷗鷺接飛浮日有
高軒過時同靜者遊塵揮山榻冷棋對竹牕幽寶笈通
三昧牙籤富九丘側聞能尚志應不愛封侯薇省牽魂

夢奠樽阻唱酬詎諳方岳寄深切廟廊憂

聽吳子談吳中事

吳子近南遊龍江復虎丘三分形勝地六代帝王州望
月晴臨嶠聽潮夜泛舟寶珠商女得靈劍海人求去日
靡蕪綠歸來茁茁秋逢宵話奇賞吾興亦雲浮

長短句

送顧華玉席上分體得三五七言

送歸客送歸客東城復西苑碧草萋萋別路長蒼山歷

歷愁心遠愁心遠征駕不可留去年送歸陌上雪今年
送歸江上秋江上秋雨霽返照入林光翳翳家在齊
川未得歸年年送客來沙際送歸客請客聽我歌我如
水中鳬君如江上波波流去不息鳬飛無遠翼迴橋轉
岸君已遥薄暮徘徊此何極

燒荒

風怒號振城瓦塞草白朔雲赭漢兵出火掃蕩原野祝
融馳炎帝下騰赤龍走朱馬雲濤沸星雨洒黃沙一望

千里通魍魎
晝帝巢穴空
敵人臨水不敢過
將軍歸來
閉關坐

吳將軍課子

大兒龍小兒虎
碌碌犬與豚
眼中何足數
將軍回獵騎
帳下斑衣舞
天河東傾月西落
蘭膏夜射簾珠薄
庭槐
烏鳥棲復驚
弦誦聲高應金柝
將有法兵有機
吁嗟易
聞不易知長平一坑
萬人死君不見邯鄲子

題風木遺哀卷

苦為席塊為枕憔悴孤兒墓田寢墓田樹聲蕭蕭寒濤
捲空風葉飄樹不止風不息孤兒欲化田中石

題趙訓夫海屋添籌卷

海上屋幾千尺麗日起扶桑鱗鱗曙煙碧仙籌刻玉雲
花湛海塵一飛籌一點借問仙翁壽幾何十屋仙籌充
畫檻仙翁家住海中村平原公子宋王孫相逢欲訪桑
田事雙鶴何年下海門

光復堂詩

歸歸光復堂湯湯歲寒溪故家世業傳江西他園豈無
木重是祖手植他地豈無土重是祖手闢物生各有主
天道終好還嵐光映朝牖不改門前山堂有趾溪有洑
我溪不竭堂永峙

六言

送客

舟橫斷岸日斜鴈度空山落霞欲採芙蓉贈遠秋江何
處天涯

湖上二首

一溪流水秋碧兩岸垂楊晝陰絕愛王家池館酒旗低
拂波心

田田蓮葉洲北寂寂孤亭水南恐有人來摘取清他萬
頃清潭

靳庄鋪坐雨次沈休翁韻

村南村北雲山亭外亭中煙景東巖過客重來蘿逕蕭
蕭薄暝

鳥啼千樹萬樹雲起前山後山門外青春向晚雨中遊
客西還

黃山店趙山家人

西山半銜落日東嶺尚宿歸雲雨過荒村向暮柴門流
水沄沄

瓠葉翻翻雨驟竹枝裊裊風斜忽見綠檀花發猶疑春
在山家

流鶯百轉深樹巢燕雙飛短簾過客不慙阮籍主人只

似陶潛

煙中白鳥雙度草際黃牛獨還山寺暮鐘何處隨風飄
落人間

蔡石岡寄瓶梨

綴樹同梅止渴登筵比蔗生津却憶帝爐燒賜曾分衣
白山人

淮北滎南接境凍姿霜色含秋如得此君萬顆豈論千
戶封侯

不緣摘取商洛定自傳分秣陵笑殺山妻鄙俗安排慢
火相蒸

武帝巡遊不返文園渴病難除誰致內林一顆且成封
禪之書

送范侍御蘇山北上四首

隼旗低拂垂柳驄馬嬌嘶落花碣石春風萬里盧溝曉
月千家

生憎白雲春去無奈黃鶯盡啼欲採芙蓉贈遠北湖蓮

葉初齊

廊廟江湖身世先憂後樂心情本是仲淹孫子怪來夷
夏知名


君山已歸地下燕泉却在天南落落故人如此蕭蕭短
髮何堪

六言近體

贈錢世恩

向風征馬頻嘶獨客行吟古堤百里文星斗下三年水

部河西遙心浦樹煙渺短夢城烏曙啼記取今宵醉別
雪堂燈火淒淒



華泉集卷七